



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tiryimym@aolima



tir yimym

TAPAK 8

Parliament nung BJD-i Waqf Bill anema nokdaksü: Naveen Patnaik

Ronaldo-i alizung tasen tongteta goal 900 junga agütsüogo

VOL. XXI ISSUE NO. 325 (ADOK 325) DIMAPUR Ki 1/2 OKN SATURDAY RONGJUI (SEPTEMBER) 07, 2024 ₹ 5.00

FGN-i 61 huba Indo-Naga Ceasefire Day among

Kohima, September 6, 2024 (TYO): Federal Government of Nagaland (FGN)-i Hokolbarnü 61 huba Indo-Naga Ceasefire Day ayongzüka mongogo.

1964 nung Government of India (GoI) aser Naga National Council tsüingda Ceasefire alitsü sign sütepba bilemteta tanü Chedema Peace Hall, Chedema village nung iba sentong agi.

"1964 Ceasefire masüandang Naga Hills nung Indian army ajanga reshikangshia liasü. Indian army-i mapang tatsüka tsüingda Naga telungpur maparen anentsütsü imla saka parnoki iba mapa magientet aser arem nung telungpur mengutet. Parnoki Naga telungpurtem anema anogo nungi hopta, hopta nungi ita aser ita nung küm aika mapa inyaka aruaka parnok alizung metongtet" ta Thepfulhovi Solo-i o jembidang ashi.

India ketdangsurtemi Naga khuret atema 'military solution' mengutetsü ta bushitet aser iba jagi 'political solution' ka alitsü mapa tenzük. Nagaland Baptist Church Council-i ketdangsuä Naga nung taintem, arogo

lennirtem, Naga sorkar ketdangsurtem aser India sorkar nungi temelaba agia Peace Mission ka tenzük.

England nuner Rev. Michael Scot, Assam Chief Minister Bimala Prasad Chaliha aser India nüjiso atema rarar Jayaprakash Narayan nung Peace Mission nung züngsemdaksü aser parnoki September 6, 1964 nü Chakhesang yimtsüing Sakraba nung Naga nung aser India tsüingda ceasefire alitsü asoshi sign südaksü, ta Solo-isa ashi.

"Indo/FGN September 6, 1964 Ceasefire dak alia tanü NSCN(IM), parnoki nungi razüka aoba teloktem, NNPGs tsüingda ceasefire aika lir. Ajsüiaka item telok den agiba ceasfires ajanga tarendakba, temulung malemba ang adokdaksü aser public asoshi khuret ang tali bentsür aruogo" ta pai ashi.

Tanga telok kecha masü saka NNC/FGN tejentiba tapubang nung iba khuret bona lir. Naga National Council ya yimtenren telok ka masü saka iba ya Naga taküm libaliro atema reju ka lir, ta Solo-isa shisem.

Gari tulutem atema NH-29 tera lapokogo

Dimapur, September 6, 2024 (TYO): Hokolbarnü gari tulutem atema Dimapur nungi Kohima aser Manipur den sendaktepba National Highway 29 lapokogo.

September 3 aonung tesem asem nung anentsüh aluba ajanga NH 29 shibanga liasü aser tanü emergency services atema lane ka lapoktsü.

Iba lenmang tekaratiba nung lapoktsü atema mapa inyakdar aser lendong atalokba tesemtem nung mapa inyakdar ta sorkari shiogo.

National Highways and

Infrastructure Development Corporation Ltd. aser state sorkari mapa inyakba ajanga tanü NH-29 nung single-lane lapok aser khen nung truck gari 20 tashi senzütsü tenzükogo.

Külen, Western Sumi Hoho president Shikaho Zhimo-i anir ketdangpurtem aser Western Sumi Youth Front president Atokiho Sumi-i anir anir ketdangpurtemi Pherima nung anentsüh aluba tesemtem semdang aser parnoki takoksa angurtem den ajurutepa liasü.

NPI atema consultative meeting yakta amentsü

Kohima, September 6, 2024 (TYO): Nagaland state sorkar atema tongtipangba teinyaktsüji Naga Political Issue latetsüba lir aser iba atema consultative meeting alitsü ta Minister & government spokesperson, K G Kenye-i ashi.

"Political Affairs

Committee mendenbuba Chief Minister Neiphui Rio-i tang rongdak nungdak kar aoshi mapa inyakdar saka state sorkari Naga yimten latetsü atema tongti süa bilemer. Anungji tekaratiba nung consultative meeting amentsü" ta Kenye-i ashi.

Dhing nungi jena arur 2 Nagaland nung apu

Guwahati, September 6, 2024 (Agencies): Assam kübok Dhing nung tebur telok kati tanur ka dak tashiyim agi shi nung medemba ken o nung tai tonglokja alir nisung ana Assam police-i Nagaland nung puogo.

Tena ya Faridul Islam Khan aser Golap Uddin na ta jangjaogo.

Iba tatalokba sülen police-i tena aputsü atema bushitepa aru.

Nagaon district kübok Dhing nung arishi küm 14 tain tetsür ka tashiyim inyakba nung tongti süa tai tongloka alisang Tafazul Islam August 24 nü asü.

Islam-i police dang nungi jena aotsü meranga awatsung ka nung pongok saka pa idakji arakset. Police-i bushisüingdanga aruba sülen Islam ya August 23 nü apu.

Union MoS Ramdas Athawale-i Naga Mandi atema lung azüngtsü



Dimapur, September 6, 2024 (TYO): Union Minister of State for Social Justice & Empowerment, Ramdas Athawale-i Seithekema-A, Chumoukedima nung Naga Mandi yanglutsü atema lung azüngtsüogo.

Nagaland nung tsünusenbongbaren ajungkettsü aser aluyimertem rongsenketzung jenjang tajungba kümdaktsütsü nükjidong nung Naga Mandi lapoker.

Iba sentong nung Chief Minister Neiphui Rio aser Agriculture Advisor Mhathung Yanthan na aden.

India sorkari linük nung aluyimertem ajak yarir kechiyong tsünusenbongtsü aser aluyimertem melira asenok taküm lia moutetsü. Naga Mandi nung shishilembartem atema retail outlets 110, warehouse unit 10 (total capacity 4000 MT) aser auction yards atema tesem ana yanglutsü ta Union MoS Ramdas Athawale-i ashi.

Naga Mandi nung Cold Storage facilities 2 alitsü aser storage shia 500 MT asütsü. Maneni

Kisan Bhavan ka nung AC aser non-AC rooms yanglutsü aser iba ya Mandi semdangi aruba aluyimertem asoshi lir ta

pai ashi. Naga Mandi ajanga rongsenketzung tsütsü tajangzük bentsür arutsü, aluyimertem renloktsü, mapa tasen adoktsü aser shishilembabaren tajungba akümtsü ta paisa ashi.

"Mandi nung süngianglijang dak alia tsünusenbongtsü ayutsü. Nagaland nung iba mapatong district ka nung tenzük saka tarutsü nungbo district shia aluyimertem ajangzüktsü asoshi Mandi kaka yanglutsü" ta MoS Athawale-isa metetdaksü.

"Sorkari Nagaland nung tanga mapare inyaknür aser tourism wadang tuluba akümtsü. Ni Prime Minister aser Chief Minister na den jembitsü aser lanur 10,000 nem mapa agütsütsü asoshi mapatong kar inyaktsü. Iba ya Naga lanurtem asoshi tajangzük asütsü" ta paisa ashi.

"Nagaland Chief Minister-i kü dang Kohima nung airport ka yanglutsü shiogo aser ni bangdak ministry den jembiteptsü nangzükogo" ta Athawale-isa ashi.

Naga Mandi mapatong atema kanga pelar ta Agriculture Advisor aser RAF LLP Mentor Mhathung Yanthan-ia ashi.

"Nagaland nung tsünusenbongtsü lenmang sadema lir. Nagaland nung

tsüngsang-mopung tajung, ali tajung aser süngianglijang o tsünusenbongtsü balala atema tetemjen tesem ka lir. Onoki mozü mamshii dang tsünür" ta Yanthan-isa ashi.

"Nagaland nung infrastructure peria mali aser tongtipangji shishilembadak tajung mali. Anungji Naga Mandi ajanga item tayongzükbatem koktettsü. Iba mapatong aser RAF (Rural Agro Farm) initiative atema pelar" ta paisa ashi.

"Advisor Mhathung Yanthan aser Chief Minister Neiphui Rio lenisüba kübok Department of Agriculture, Nagaland den yaritepa iba mapatong inyaktsü renem" ta MLA & Mentor, RAF LLP, Ar Jwenga Seb-ia ashi.

Rural Agro Farms (RAF) LLP nem Nagaland nung comprehensive agricultural mandi amenoktsü aser mapa inyaka aotsü atema government permit agütsüogo. Iba ya Build-Operate-Maintain Public-Private Partnership (BOM-PPP) model kübok inyaksangshia aotsü.

Naga Mandi ya alia acre 10 nung yanglutsü aser Anaj (grain) o Sabji (vegetable) markets atema shilem balala alitsü.

Naga Mandi ya wholesale aser tsünusenbongtsü ayokba tongti tesem ka asütsü.

Senotsü maliba ajanga Nagaland engineer temi mapa sadema meinyakteter

Kohima, September 6, 2024 (TYO): State sorkari engineers aser technocrats dak sempet alibatem ajanga state renloka mouteter aser ibaji senotsü maliba ajanga lir ya Power and Parliamentary Affairs Minister K. G. Kenye-i ashi.

Hokolbarnü Federation of Nagaland State Engineering Service Associations (FONSESA) indang General Biennial Conference nung jembidang Minister Kenye-i iba ya ashi.

"Nagaland nung Engineer temi senotsü peria meliaka infrastructure renlokdaaktsüba atema tenüngsang agütsür. Lokti ka tejakleni aotsü asoshi power, communication & road sectors ya kanga tongtipang saka gari lenmang majungba den power supply shitak manguba ajanga

wadang aika nung kongshir. Iba ajanga lokti aser yimtenren asoshi tebilemtsü bentsür arur" ta pai ashi.

"Naga Political Issue ajanga putu aika Nagaland renloka mouteti arur anungji asenoki state renloktsü aser tejakleni aotsü asoshi iba ken o angatetteptsüba nung temulung agütsütsü ayongzüker" ta Kenye-isa ashi.

Nagaland state tejakleni anir aotsü atema technocrats aser government officers-i yimsüsürtem den amalitepa inyaktsüla ta paisa ashi.

"FONSESA ya 1985 küm tenzük aser tanü tashi asen state nung engineers asoshi tashi ka ama inyaka arudar" ta Hutoi Sema-i FONSESA presidential address jembidang ashi.

Alima kanga kara ainer aser

engineering wadang-a kasa tejakleni aoer. Tanü Artificial Intelligence, Machine Learning, Internet of Things (IoT), Building Information Modeling (BIM), aser smart infrastructure systems amala technology amshir, ta Hutoi-i ashi.

"Asenoki item technology tasentem amshiba ajanga mapa tajungba aser tezübaba inyaka otetsü" ta paisa ashi.

"Nagaland Engineering Service Rule 2012 (NESR 2012) tekaraba nung mapa renema mapa tenzüktsü imlar. FONSESA-i partner associations den külemi state sorkar dang IAS seat encadrement aser NPSC member appointments nung shilem shitak angutsü atema temeten meshir" ta FONSESA president Hutoi-isa metetdaksü.

Mokokchung nung MSTM pur indang 'Aotemulung Kilem' lapok



Rev. Jongpong Jamir-i Mopungchuket Senso Telongjem Mokokchung indang 'Aotemulung Kilem' lapoktsüba mapang tangokba noksa nung angur. Mokokchung, 6th September, 2024.

Mokokchung, Rongjui/Sept. 6 (TYO): Mopungchuket Senso Telongjem Mokokchung (MSTM) indang ki 'Aotemulung Kilem' tanü Mopungchuket Baptist Arogo Pastor, Rev. Jongpong Jamir-i meraketa lapoktsüogo. Iba kilem ya Mokokchung town kübok Alongmen Ward nung aliba 3-Kit Photo House anasa lir. Iba ki Mokokchung Town Baptist Arogo (MTBA) Associate Pastor, Rev. Temsuwati Kichu-i meshitettsü. Mokokchung nung iba ki ya tobur tajung rongnung

ka asütsü. Iba ki ya sen 2, 13, 69,215/- (rupees two crore thirteen lakh sixty nine thousand two hundred fifteen) intoka asü. Iba kilem nung ki tatem (floor) 6 lir. Tematiba floor ji conference hall lir aser yangji kitchen aser reception keta lir. Tanüngbatemji commercial atema amshitsü. Conference hall ji nungdakbapur atema rental nung amshitsü. Ibai 22nd March, 2022 nung asü tenzüik aser July 2024 nung renem, ta Aotemulung Kilem Kisüba Luden tezülur, Watisütsüngi kisüba osang lemsatepdang

metetdakttsü. Sentong nung Alongmen Ward Chairman - Rongsentemsu, Mopungchuket Village Council Chairman - Akumjungba, Aotemulungtsür Telongjem Mokokchung Town tir - Kilangyangla par asemlungnen o tatsütsü jembü. Mopungchuket Senso Telongjem Mokokchung tir - Aotemsu-i tarur pela-a agizükba den MSTM tezülur - Supongasang-i anküp o lemsatep. Sentong nung Sobujongshi menden liasü aser Chubawapang-i ken tajung ka tena tesentepertem saksalemdakttsü.

Mokokchung Photography Club Inti Senden aka



Mokokchung, September/Rongjui 06 (TYO): Mokokchung Photography Club (MPC) Inti Senden ka September 6 nü Hotel Magnus, Conference Hall nung kaogo. Mokokchung Photo Club ya 2011 küm November 28 anogo tenteter kelen mapang balala nung Photo Exhibition, Photography Competition aser Workshop sentong ama tanga State-tem nungi Photographer mongintem anir aruagi sentongtem achayanga ayonga agia aru. Ano maneni Mokokchung Photography Club takok ngua anir aotsü asoshi iba senden nung telok ajaki mulunga Mokokchung Photo Club ketdangsütsü Convenor Takomeren aser Secretary Moamongba ta shima tena nem mapa nungloktsüogo.

küm Mokokchung nung iba ayuba nung shilem tulu agiteter,maneni ano noksa ajanga asen lima tobur ajungba alima dang sayua bendang lima nungi limapenzürtem puatsüsa (tourism promotion) mapa tuluka inyaktettsüta lemsatep. (Maneni tapak 8 nung...)

Sentong nung Wb.Limalenden Longkumer, Editor Mokokchung Times & Founding Member ajanga "Mokokchung Photo Club, What Next?" ta asüba onük nung ajemdaker jembidang 2011

Tongti o jembirisa Mokokchung ama alima tilaka nung Photography ajanga koba tashi ka inyaktettsü iba tsütsülen lemsatepdang, noksa tangokba mapaji ajanga kati ka den metetepa nübur tsüngda nung telungjem lenmang lapoker. Noksa tangokba ajanga nisung kati pei shisa asalendong amshia pei takum anisüngzüka tepok sünga alitsü lenmang lapoktetsü, tanu putu alima kanga dang karaa aniba mapang ka nung tejen osettsüset,ki o jen aser likha lima tangokba ayubaji ajanga asen lima meraket tejentem rizünga

Tanü Kohima nung aliba sorkar office sodi alitsü

Dimapur, Rongjui/Sept. 06 (TYO): 14th Nagaland Legislative Assembly indang 5th Session mechi August 24, 2024 (4th Saturday) mapa inyakba anogo ta sangdongba

melen September 7, 2024 (1st Saturday) nü Kohima nung aliba State sorkar indang office sodi alitsü, ta Nagaland Angh ajanga sangdong ka nung metetdakttsü.

DC Chümoukedima-i senzusemponger atema totuyuba agütsü

Dimapur, Rongjui/Sept. 06 (TYO): NH-29 nung alinen aluba aser lenmang anenzüka aoba mechi Chümoukedima nungi Kohima aser Kohima nungi Chümoukedima lenmang nung senzürtem tiptema jajatettsü mechi Deputy Commissioner, Chümoukedima ajanga totuyuba kar agütsüogo. Lenmang aser tzüngsang-mopung takzüba sülen NH-29 Four Lane Road nung Chathe Bridge (Patkai Jn.) nungi New

Chümoukedima tashi nungdakba oset bena aliba heavy vehicles dang ghonda lemsar jajadakttsütsü. Gari senzusempongba ya Traffic Police, Chümoukedima achayangtsü. Chümoukedima Town (Old Check Gate) nungi Old Chümoukedima Village Road ajanga New Chümoukedima tashi light vehicles kisüng jajadakttsütsü, ta sangdong ajanga ashi.

BJP Nagaland tiri anir Eastern Nagaland semdang



Dimapur, Rongjui/Sept. 06 (TYO): Bharatiya Janata Party Nagaland state tir Benjamin Yephthomi-i anir külem tenzüker temi 'State Presidential Mandal Tour to Eastern Nagaland for Membership Drive Campaign - 2024' nung shilem ka ama September 4 & 5, 2024 anogotem 41 Tizit, 43 Tapi, 44 Phomching aser 46 Mon Mandal tem semdanga liasü.

lir ta BJP state tiri ashi aser party lenir aser karyakartas tem dang tang teinyakdak membership drive nung nisung timbai shilem agitsüsa inyakttsü ayongzüka liasü. Kasa mapang Mandal balala nungi party lenirtemia grassroot level nung party aintsü atema inyakyim nung tetsükdakttsü mesüra tebilemetsü ajuruba indang lemsatepa liasü.

Parnoki item assembly constituency semdanga party lenirtem den senden amenba mapang level ajak nung party indang organisational structure tashi itshitsü kanga tongtipang

Nagaland nung BJP tajungba kuma renloktsü asoshi party inyakyim nung akokba agi yariteptsü aser amalitep akatsü, ta Benjamin-i karyakartas dang ashi.

ANCSU-i scholarship application atema metetdakttsür

Dimapur, Rongjui/Sept. 06 (TYO): All Nagaland College Students' Union (ANCSU) ajanga sangdong ka nung, Post Matric ST scholarship atema scholarship application ya

National Scholarship Portal <https://scholarships.gov.in> ajanga September 6, 2024 nungi November 24, 2024 tashi agütsütettsü, ta metetdakttsü. (Maneni tapak 8 nung...)



Mangmetong Kaketshir Telongjem-i ayongzüka September 5, 2024 nü Teacher's Day nungtem nung tesayurtem nem tetushi agütsüba sentong ka "Empowering educators: Strengthening resilience, building sustainability" omen dak rangoker yim community hall nung akadang tetushi tejaoker, Wb. Sangpangchang Longkumer, EAC Ongpangkong den shilem agir aser adenertem külemi tangokba noksa nung angur. Sangpangchang-i tayongzüka o tulu bener arua tesayur, kaketshirtem sentepa alirtem ajungshia liasü. (Mokokchung, September 5, 2024)

Vinesh Phogat aser Bajrang Punia nati Congress nung aden



September 06, 2024 nü New Delhi nung Congress General Secretary, KC Venugopal-i (tiyong) wrestlers- Vinesh Phogat aser Bajrang Punia na party nung agizükba sülen tangokba noksa nung angur.

New Delhi, September 06 (Agencies): Haryana nung assembly election agitsü mapang ana nung lia Hokolbarnü Wrestlers- Vinesh Phogat aser Bajrang Punia nati Congress party nung denogo.

Congress Central Election Committee-i dang tena election nung toktepdaktsütsü asü metoktepdaktsütsüar telemtetba agitsü.

Congress general secretary KC Venugopal matsüngdang Phogat aser Punia nati party nung aden, ta party otongdar Pawan Khera aser Haryana Congress Tir Uday Bhan nati metetdaktsü. Tamalen Phogat aser Punia nati Congress Tir,

Mallikarjun Kharge ajurua liasü. Osangbenertem den jembidang Phogat-i, lai ajangshiba amaji saisaponger shinga nem-a majangshidaktsüner, ta metetdaktsü.

“Ni Congress party dan pelar. Timtem mapang nung ang shirnoki nenok yarirar metetter. Onoki lenmang nung longkak aitba mapang nung BJP dak alaka party ajaki onok pusema liasü,” ta lai metetdaktsü.

“Iba timtem ajangshir tetsür ajak onoki nungiter,” ta laisa shisem.

Taoba mapang BJP MP aser taoba mapang Wrestling Federation of India Tir, Brij Bhushan Sharan Singh-i

tetsürtem anema inyakba atema 2023 küm longkak aiterterem rongnung Phogat aser Punia na densema liasü.

Hokolbarnü Phogat-i nija kuli kar nung ajemdaker Indian Railways nungi anenogo.

Phogat aser Punia nati Haryana assembly elections nung tokteptsü asü?, ta asüngdangba langzüdang Congress-i, Central Election Committee-i iba atemaji telemtetba agitsü, ta ashi.

Haryana nung Congress aser AAP nati menden lemsar tokteptsü atema jembidar.

Haryana nung assembly menden 90 atema October 5 nü election agitsü.

Parliament nung BJD-i Waqf Bill anema nokdaktsü: Naveen Patnaik

Bhubaneswar, September 05 (Agencies): Brihostibarnü Odisha assembly nung opposition lenir aser BJD lenir, Naveen Patnaik-i, Parliament nung Waqf (Amendment) Bill benokra par party-i iba bill anema sashia nokdaktsü, ta metetdaktsü.

BJD Minority Cell senden nung jembidang taoba mapang Odisha Chief Minister Patnaik-i, Odisha ya tesünep nung aliba, adianu temeimtep aliba aser yimjung aliba state ka lir, ta ashi.

“Iba Bill ya Parliament nung

benokra BJD-i sashia anema nokdaktsü,” ta Odisha nung ponguaben tashi Chief Minister inyaksangisa metetdaktsü.

Waqf (Amendment) Bill ajanga Waqf kiojentem registration inyakyim ajak centralised portal ka ajanga melenshitsü. Iba Bill ya joint parliamentary committee ka matsüngdang benoka lir.

“Asen linük nung sobaliba balala aika aliba atema asenoki nüma atanger. Linük azükarutsü atema ajaki amalitepa inyaksü nungdaker,” ta Patnaik-i ashi.

Patnaik-isa, “BJD ya secular party ka lir, NDA mesüra INDIA teloktep nung densema mali. Tamalen-a BJD-i NDA sorkari benokba bill kar pusema liasü aser ibaji federalism pusemba agi liasü,” ta BJD Minority Cell lenir, Munna Khan-i metetdaktsü.

Khan-isa, Odisha nung loktiliba nung yimjung raksatsütsü atema merangra ibaji party-i magizükettetsü, ta metetdaktsü.

Lok Sabha nung BJD nungi MP ka danga mali saka Rajya Sabha nungbo BJD MP 8 lir.



New Delhi, September 06, 2024: AAP lenir, Amanatullah Khan apuba anema New Delhi nung AAP züngsemtemi longkak aيتدang sepaitemi parnok nokdangba noksa nung angur.

MOLUNGNEN O



Onoki teti meima aliba temeim ojala NÜKMILA JAMITSÜR (Akhoya) arishi küm 104 junger 20th August 2024 anogo nü ajungbena iba lima nungi pilar, mangyim jashi nung aliba mapang Kija aser Kibong, Arogo, Yimten aser Lokti balalai ozü den Sarasadem, Nübu, Shisatsü aser Rongsen agi yariteber ajak dang onoki kanga pelaba lemsateber.

Teyanglur Tsüngremi nenok ajak maneni moajang ta ozü Sarasadem.

Temeim:
Kinungbo, Chirnur, Semchir, Anük Apang aser Kinungertem



Investor Education and Protection Fund Authority, New Delhi nung General Manager aser Deputy General Manager shimtsü.

Investor Education and Protection Fund Authority, Ministry of Corporate Affairs, Government of India, New Delhi-i General Manager (Level- 13) post ka (1) aser Deputy General Manager (Level 11) post ka (1) deputation basis nung shimtsü. Investor Education and Protection Fund Authority ya Companies Act, 2013 kükok tentetba statutory tentet ka lir. Item psoat ya Delhi nung amenoka lir.

2. Iba advertisement agütsüba sülen anogo 30 tsüngda prescribed format nung application ji duplicate tim lenmang ajanga General Manager, IEPF Authority, Ground Floor, Jeevan Vihar Building, 3, Parliament Street, New Delhi-110001 nem agüjang.

3. Application format, telatetbatem, nungdakba qualifications aser tanga osang tejangja ajakji Ministry of Corporate Affairs' website www.mca.gov.in mesüra www.iepf.gov.in nung angutsü.

* Tekalen shia aliba menden tazüngji khenpiga atema dang lir aser appointment mapang nungbo melenshitsüa akok.

CBC 07110/12/0010/2425

HOMI BHABHA CENTRE FOR SCIENCE EDUCATION TATA INSTITUTE OF FUNDAMENTAL RESEARCH National Olympiad Programme 2024-2025 in Astronomy, Biology, Chemistry, Physics, Junior Science

Iba sentong nung shilem agitsü jangra aliba kaketshir ajungai **National Standard Examinations (NSEs)** (science subjects atema) nung shilem agitsüla, koba **Indian Association of Physics Teachers (IAPT)** ajanga **November 23 aser 24, 2024** anogotem agitsü.

International Olympiads of 2025 nung shilem agitsü asoshi NSE nung qualify asütsü ya mera mezüngbuba lir.

Enroll asütsü atema:
NSEs: <https://www.iapt.org.in> (Aug 21 - Sep 14, 2024)

For more details: <https://olympiads.hbese.tifr.res.in>
<https://www.iapt.org.in>

CBC 48143/12/0009/2425

J&K assembly election atema BJP-i party manifesto sayaogo

New Delhi, Rongjui/ September 06 (Agencies): aser October 8 nü vote azüngtsü.

Hokolbarnü Bharatiya Janata Party-i Jammu & Kashmir Assembly elections atema party manifesto sayaogo.

Union Home Minister, Amit Shah-i manifesto sayatsüba sentong nungji Jammu and Kashmir BJP Tir, Ravinder Raina den party lenirtem liasü. Raina-i Nowshera menden nungi tokteptsü.

Jammu & Kashmir Union Territory nung September 18, September 25 aser October 1 anogotem nung election agitsü

Iba sentong nung jembidang Shah-i, India nüchiso anguba mapang nungi Kashmir Valley ya BJP atema kanga tongtibang liasü, ta metetdaktsü.

“Pandit Premnath Dogra mapang nungi Shyama Prasad Mukherjee-i taküm tenla agütsüba mapang tashi nung Bharatiya Jana Sangh-i iba atemaji inyaka liasü aser tang Bharatiya Janata Party-i inyaker,” ta Union Home Minister-i metetdaktsü.

(Maneni tapak 8 nung...)



TIR YIMYIM

YIMOBILEM (EDITORIAL)

DIMAPUR

KÜPTOKNÜ

RONGJUI 07, 2024

Shibai shiba aitsütsü ?

Nagaland nung lenmang tongtibangtem Dimapur-Kohima, Mokokchung - Tuensang, Mariani-Mokokchung, Amguri-Mokokchung, Tizit-Mon aser Mokokchung-Wokha-Kohima tsüngda jajaba gari lenmangtem ajunga nung ya tapayu agi gari tajung jajatsülaa masü aser tarendak agi gari tejen jajatsülaa masü ta nübertem dang masü yimsüsürtema shisabolu aser tezüdang tia nung lir. Item lenmangtem ya tenüng agibo National Highways saka India nung tanga state-tem nung yanglua akaba National Highways kenyongi memesük, asen meyong National Highways yabo lenmang ilaba dang masü saka kibur maliba alu lenmang amai tesem-tesem nung anentsü agi nembang, tesem kar nung arem agi meyibang, tesem kar nung lishi agi ajanga aoa majung aser lenmang songjen nung tarok-tapa agi kolen paidoker kolen mepaidok, anogo shia nisungtem gari raksaba den temanga raksa aser tatongtsüka mapang shitak nung metongtet, gari bara aser gari yanglushiba nung sen endokba agi kidang nüngdaka teperitsüka meperitet timtem aser nüngdak ashidak maka nübertem timtemdagi. Aji oda, Nagaland kechalena gari lenmang majung nungji, nübertemi pei government aitsür aser government-i lenmang yanglur contractor aser National Highways & Infrastructure Development Corporation Limited (NHIDCL) aitsür aser NHIDCL purtemi alima tsüngsang mopong aser ali ochimashiba nem tongloktsür ta shibai shiba aitsüar mejangjatetika taitütep agi süngogo. Alemlibo, Nagaland nung gari lenmang tongtibangtembo Border Roads Organisation (BRO) purtemi repranga liasü. Iba mapangbo lenmang tila süaka talisa Dimpur-Kohima aser Mariani-Mokokchung lenmangtem ama yabo süsür kanga junga anepaluteta liasü. Kasaji PWD purtemi repranga lenmangtema junga dang liasü, aji oda küm metsü – semer tejaklen iba mapang nung yangluba black toping lenmang tesem aika nung meraksai tanü tashi iba madak jajar. Ajisüaka, kodang BRO nungi state-i lenmang ajak meshizük, metetmeteta National aser State Highways nung kilentzü okteter tema mali aküm aser mapang talangka nübertem lenmang tajung nung mesenzütet kanga timtema aruogo. Iba sülena tang amai four lane mesüra two lane yanglutsü atema tesem kar nung lisopur contractor nem agütsü aser kar nung company tulu nem agütsü ta lenmang shitak yanglutsü nükjidong nung mapa lemstüba meteta aruogo. Ajisüaka kibur matumeraba ngur kidang inyakertemi ki mapa dena shitak meinyak ser yutsü amato, Nagaland nungbo nebertemang ochimashiba aser government nung alirtemang ochimashiba ta ajaki sen aginür ashi, lenmang ajung majungji kecha hau ta mali auyi aser lishi mélanga jajaba jakla ngur ali teret nung lenmang amendaker yanglu masü saka alinang agi four lane aser two lane yanglua yutsüba agi, tangbo nisung taküm ka dang masü aser ana danga masü aika samaogo aser ano samatsüba tia nung lir. Aji oda, asen lima nung yangluba lenmangtem yabo Indian National Highways masü saka Naga National Highways asüba agi tajung nung masü tamajung nung tokteper amai lenmang ka dang tamajungba aser ka dang tamajungba ta yangluba agi, tanübo akhi putu nung amato, asenok Nagaland nung alir Naga nungertembo pei kolak nung pei khu bener tetsüng agi jajatsüsa kümogo. Asenok dak matumalem jakla aika lir saka ajak dang matutiba jaklajibo, lenmang shitak meyangu aser merenem ser asenoki lenmang yanglurtem nem 'Mapa renemba' kuli kakat agütsütsü aritepba ya asütsü ! Aji kechiba ? Lenmang renemba kuli kakat agütsü nungang asenoka asen shilem terara alemtsüsa senotsü angutsü asü ? Atangji, angutsüa akok, saka joko asenokbo ajiang magili aser lenmang majungba tai ajak ya asenok arok tai kümer, shitakba Naga National Highways ya Indian National Highways amato ali nung masü saka mopong aser tzü manung jajar ama, gari atashibaa memetet ayongayonga tetsübu aser tarendak melii jajatsüsa asenok nübertema, engineer-tema, contractor-tema aser yimsüsürtema temulung meyipdi.

- Yimozülur dangi-

M.A.Naga.4th mile,
H/No 16.near four lane NH-29.
Dated=28:8:2024.

Tang kanga dang sashia jembibaji NLTP ya lir. Ni Tsüngrem tsübur aser ya pa (Tsüngrem) anemer masü, saka ochi O tasü ita jembir aser English/Nagamese news ajak nung comments aika yokogo. Ano ni metetba Naga/Aor tongtipang nisung aser Rev, Pastor aika den lemsatepogo. Nagaland Liquor total prohibition Act (NLTP) ya tang tasen jembir masü, joko küm 35 arur, NBCC, ABAM, aser tribal churches-temi akangba ama govt-i agizük. Ibai agizüka yutsürbo item telok balala (NBCC, ABAM) lenir, tasü maiter rogo-tem amoa oadok. Govt dang parnoki akhang aser govt-i hai ta agizük saka akhangertem mapa mali kümer olta govt/police dang timtema aru.

Ni shinubaji ya! akidangbo govt licence nung senjang temela aser yi tajong original ajem, saka tangbo NLTP arur akidang nungi meyirjang aikati timba yi ayokdak aküm iba den jenjang timba agi yi tamajung Naga nungertemi jemeso. Süra dry state kümer yi ayokdak timba renloka aodang item telok (shiri yi mayoktsü songtem) kong lir? Iba den asen state rongsen-ketzüng tamajung aküm aser Naga nunger sen agi Assam state takar kümdaktsü. Tanü govt-i kinük (four corners) ajak asadanger govt licence nung rules & regulation küpok lapokti ta jembi dang tasümait kania tem to mokoteta adokdar.

Ni shinubaji ya! NLTP (shortly dry state) govt-i agizüka alidang tu sarasadema tangar dak temulong melema, meyimlai, menongloktsüi yi ayokdak samatsütsü meranga inyaksüla asü? tang yimdong sünga meyirjang aika yi ayokdak alidang item NBCC/ABAM kong liasü aser kong lir? tang govt-i yi ayoktsü licence agütsütsü ta olulu ka angashir ano item telok tu jika, jingmoko, hangor, japo, afo, leplo ama mokhong-mokhonga adokdar. By chance govt-i mulonga melapoktsü lemtet nung item tiazü tasü mait tamanger telok ya takok nguogo tasür pei-peu atsükdaki (hiding place) iadoktsü arendaka bilemstür. NBCC/ABAM-i Tsüngrem tsüngdang temenen oset mayoktsü aser Naga lanur taküm kümzüka ayutsü mesüra rongsen melalui ajangzüktsü nükjidong nung masü, par olaji govt-i angarbo ojang ta ali shi nung dang asüküma inyak. tat agi-yimti ka mi agi rongdok dang yimer ajak adenshiang ta yim-yim ayimoktsütetbaji tuluka bilem, iba yimtiji mi lendong nungi kümzüka yuteter/meyuteter aji tongtipang süa bilemstüla.

Ozüng ka takok ngua renemtetbaji tongtipang masü saka koba/kechi atema ozüngji yanglu iba nungji takok ngutettsüla. Rev, Dr, Missionary Aor timba lir, odang Christmas gift amaidang alemer südi saka ali shi nunga Tsüngremer wadang nunga Aor tasü mait aser kanga rajang kümogo, kar dak alaka English praang.. Praang... ta sayutsüngir/sarasademteter mali, churches balala nung neburi Tsüngrem tsübu tenla agütsüba crore of crores benshia pastor-tem Ali/ki alitener aser arogo nung telok balala shimer parnok kipoksem sarasadema senzüdaktsüli pa (Pastor) kidang moka kazülü ta asüba aika lir. Tanü 99% tamanger aliba state crore of crores nepuri nüktzü yima agütsüba senpong amshiba dak alaka prayer centre nungdang tashidak aneper, pvt hospital nungdang shiranger ajonger, itasen lakh lakh chiaka pvt school nungi dang tanur tajong adoker. Oh NAGALAND/AOR!!!

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Nicaragua nung Mountain Gateway nung pastor 13 chiokogo



Nicaragua nung tepuokdak nungi chiokba Mountain Gateway nungi pastor tem noksa nung angur.

September 06, 2024: United States kübok Texas nung amenoka aliba Mountain Gateway ministry nungi pastor 13 taküm küm tetenzüklen Nicaragua sorkari pua tepuokdak yua liasü, ajisiüaka September 5 nü parnok ajak chiokogo.

US sorkari tiyongtsü ia inyakba sülen pastor 13 densema yimtenren tsütsülen nungi pua tepuokdak ayur nisung 135 chiokogo, ta U.S. National Security Advisor, Jake Sullivan-i sangdong ka ajanga metetdaksü.

“Pei tebilemba jembiba, association nung adenba mesüra pei yimsü amangba atema shinga tepuokdak mayutsüla,” ta Sullivan-i ashi.

Yaküm December ita nung Nicaragua nung pastor tem aser Mountain Gateway nung züngsem aikati senotsü tsütsü ochimashi mapa inyak, ta tai tonglokja parnok ajak ajak küm 12 nungi 15 tashi tepuokdak ayutsü obendang agüja liasü. Parnok dang senchi dollar sen billion 1 jungnüa achi. Parnok atema ken o jembitsür attorney anata aija tepuokdak ayu.

Mountain Gateway tentetsang aser Tir, Jon Britton Hancock-i, “Iba anogo atema onoki Tsüngrem dang sarasadema liasü aser Tsüngrem dak amanga liasü. Parnok chioktsü atema Congress züngsemtem, State Department aser Department of Homeland Security-i anibelem kanga arema inyakogo,” ta metetdaksü.

Taküm March ita nung court nung aitsürtem rongnung Mountain Gateway nung pastor aser administrator Marisela Mejía-a densema liasü. La tanur asoba sülen kobi melii la tepuokdak puoka liasü. La aser la kinüngbu Mountain Gateway nung tongti Pastor Walner O. Blandón naprongla küm 15 tepuokdak ayutsü obendang agütsü aser tena dang senchi dollar sen million 160 chia liasü.

Sullivan-i, “United States-i maneni Nicaragua sorkar dang tang tepuokdak aliba sensotem chioktsü atema tayongzükba

agütsür. Nicaragua nung sensotem agizüktsü atema Guatemala sorkari melungba atema US-i parnok dang pelar,” ta metetdaksü.

Taküm March ita nung Nicaragua linük nung court kati Mountain Gateway ministry ka den sendaktepa inyaker Nicaragua nung pastor 11-i senotsü dak sendakba nung ochimashi mapa inyakogo, ta aija liasü. Kasa ken o nungsa US senso asem nem-a tai tonglokja lir, ajisiüaka parnokbo mapu.

US nungi Nicaragua dangi senotsü yokba tsütsü ochimashi lir, ta ketdangsertemi tai tonglokja liasü.

Mountain Gateway ministry-i Nicaragua linük nung ayongzükba agiba evangelistic sentongtem aika nung nisung million 1 dak tema adenba sülen sorkari Khristantem anema inyaker.

Managua nung aliba Central Judicial Complex nung pastor tem anema ken o angadanga sülen parnok anema temerenshi obendang agüja liasü.

January 17, 2024 nü Nicaragua nung US senso asem aser Nicaragua nung pastor 11-i senotsü tsütsü ochimashi inyakogo, ta tai tongloktsü.

America nung asem- John Britton Hancock, Jacob Britton Hancock aser Casandra Mae Hancock nungeri US nungi aruba sen agizüktsü atema Nicaragua nung Mountain Gateway Ministry kongsang lapok, ta parnoki metetdakja liasü.

January ita nung osangbener den jembidang Mountain Gateway otongdar Steve Lisby-i, “Tai tongloktsüba ken otem tamendakdakji shidak masü. Senotsü amshiba dak sendakba inyakyim shidak onoki benshiogo. Onoki Nicaragua nung meimba agi iba linüki aru aser onoki parnok den Yisu indang lemsatepner,” ta metetdakja liasü.

Ministry-i, iba ya tamangba yimsü aser yimtenren tsütsülen nungi reshikangshiba lir, ta shia international human rights organizations aser U.S. State

Department dang tiyongtsü aita inyakdaksüner, ta mepishiba sülen US-i tiyongtsü ia inyakba ajanga tang tesüsa Nicaragua nung pastor tem chiokogo.

Nicaragua nung Tir, Daniel Ortega-i aniba sorkari, 2018 küm nüburtemi longkak aitiba aser Tir menden nungi pa atsüngdoktsü merangba nung Khristan putirtemi shilem agiogo, ta tai tonglokja linük nung Arogo anema inyaker.

2018 küm nüburtemi Ortega Tir menden nungi anentsü takhangba agüja longkak aitiba sülen nungi sorkari parnok anema ola adokertem aser Arogo lenirtem anema inyak tenzuka liasü.

Nicaragua nung Ortega-i aniba Sandinista National Liberation Front sorkari Mother Teresa’s charity densema melungtet telok meyrjang aika anentsüogo.

Pope Francis-i Papua New Guinea semdang



September 06, 2024 nü Papua New Guinea yimtiba, Port Moresby nung aliba Jackson’s International Airport nung Pope Francis aser Papua New Guinea deputy prime minister, John Rosso na tangokba noksa nung angur.

September 06, 2024: Hokolbarnü Pope Francis, Papua New Guinea linük tonga ogo; pai Southeast Asia aser Oceania nung linük pezü semdang.

Arrshi küm 87, Pope Francis Jakarta, Indonesia nungi apusoba sülen Port Moresby airport tonga aodang linük nüburtemi pa pelaa agizük.

Pope Francis-i anogo asemnü Indonesia semdangba tatembangbuba anogo nung (Brihostibar nikongdang) sports stadium ana nung tekülem sentong agi.

Vatican-ibo iba sentong nungji nisung 60,000 shi adentsü ta bilema liasü aser Indonesia nung ketdangsertemia nisung 80,000 shi adentsü ta bilem, ajisiüaka Vatican otongdari iba

ANOGO ABEN TSÜNGREM DEN

Tematiba Mapa (T. Ken 100:1-5)

Nai Tsüngrem tenüng asangba ken atandang Laishiba nung Tenüngsang Ken 100 kaji atener ta bilemetang. Iba ken nung Kibuba koda külemtsü tetuyuba agütsür.

Shibai Kibuba külemtsü ? “Nenok alima ajak, Kibuba dang tepela ola yokang” (t.1). Tsüngremi alima ajungai Pa külemdaksüner aser tenüng sangdaksüner. Kechiba asenoki alima ajaki oa osangtajungji sayutsüla ? Kenü alimai Kibuba dangi tepela ola yoktsü atema.

Asenoki Kibubaji koda külemtsü ? Mezüngbuba, tenzükba ajanga. “Tepela agi Kibuba tenzükang: Pa tsüngdangi ken tena arung” (t.2). Asenoki tepela agi Kibuba tenzüktsüla kechiaser asenok mulungjang nung tepela lir aser Kibuba tepelai asenok nem tashi agütsür.

Tanabuba, asenok ken agi Kibuba tenzüktsü akok. “Kibuba tsüngdangi ken tena arung.” Asenoki kenji tentet mapa ka ama dangbo matentsü. Ken kaket amer ken atener saka asenok mulungjangbo talang nung pilar alir. Ken nung ashiba tetezüji shisadanga atentsüla.

Asenoki Pa nem bendanga agütsüba ajanga Pa külemer. “Kibuba, Paji Tsüngrem ta nenoki metetang: Pai asenok yanglu, aser asenok Pa chiyimdak chiyimba santem” (t.3). Pa nem agüjang. Pa anidakang. Pa dang tashi angang.

Tatemsaaasenoki tenla agütsüba ajanga Kibuba külemer. “Tenüngsang agi Pa süngkümi iang, aser Pa talidaki sanga iang; Pa dang tenüngsang agüjang, aser Pa nung moajang” (t.4). Nai tenla sabang nung shiruru agütsütsü menüngdak, saka nai ne mapang, sen aser temetetba agütsütsü akok.

Kechiba asenoki Kibuba külemtsüla ? “Kechiaser Kibuba tajung lir; Pa temeim taochi aser putu ajak dang Pa temulung lemetetba, tatem maka” (t.5).

Khristan taküm nung tematiba mapaji Kibuba külembaji lir. Ne taküm kodanga tematazüksü ka tesüdaksü. Tepela aser tenüng asangba mulungjang agi ken tena, bendanga agüja aser tenla agüja Pa külemang.

sentong nung nisung 100,000 dak tali aden, ta metetdaksü.

Khristan nütsüng million 8.9 aliba Indonesia linük nung Pope Francis-i tamangba yimsü balala amangertem tsüngda tesendaktep tajungba akümtsü atema ajungshia liasü.

Indonesia nungsa Pope Francis aser Jakarta nung aliba Istiqlal Mosque nung Imam tongti nati yimsü dak sendakba nung raraba anentsü aser alima tzü-mopung kümzüktsü atema tezüngzüktep ka agiogo.

Papua New Guinea linük nung Francis-i loktiliba nung temeden balala alitsü atema tayongzükba agütsütsü tebilemba lir. Iba linük nung nisung million 10 dak tali lir aser parnok teimbaka aluyimertem lir.

Papua New Guinea yimtiba, Port Moresby nung aliba St Charles Luwanga Arogo nung choir conductor, John Lavu-i, Pope-i semdangba ajanga pa tamang jenjang tajungba akümtsü, ta ashi.

Pope Francis-i kanga tezülen aliba Vanimo semdanga par linük (Argentina) nungi Khristan missionary kar ajurutsü. Missionary tem jagi tribal nisungtem den Khrista osangtajung lemsatepa Khrista dangi anir arutsü atema inyaker. Papua New Guinea semdangba tanabuba Pope ji Francis asütsü. 1984 küm John Paul II-i mezüng Papua New Guinea semdanga liasü.

Pope Francis-i maneni East Timor aser Singapore na semdangtsü.

**AO OSHI ANGAZÜKDAK:
TANÜ ANGAZÜKTSÜBA OJANG**



Tir Yimyim

Tamentep

- (n) atongtepa ayuba (pilling)
- * Lung jara tamentep tashimaitba agi laoa chirep.

Tamet

- (n) tzü nung metaba (boiled)
- * Tsük tamet anü nung pur asener.

OLONG PAITEP # 6917

1				2				3		
										4
		5	6					7		
8				9		10	11			
			12							
13		14				15				16
17		18		19		20				
	21									

TIPIEN

- 1. Tepungba masü - (10)
- 5. Tazüngtsü züluba - (5)
- 7. Ozü tapu ka - (3)
- 8. Anguba shilem - (5)
- 10. Tera / Ishika - (3)
- 12. Teben sobotsü - (5)
- 14. Te _ _ _ gjem - (3)
- 15. Moapu nung chiyimba shiruru - (5)
- 17. Terok nungi adokba - (3)
- 19. Temela masü - (5)
- 21. Tesünep - (10)

LANGTSÜNGLEN

- 1. Tepungba masü - (5)
- 2. Taleptsü yin - (3)
- 3. Rong tapu ka - (3)
- 4. Yimsüsüba kümsük - (4)
- 6. Mangyimba mapang - (5)
- 9. Meimchir rongnung telemsa - (3)
- 10. Atentsü asoshi mejemba - (3)
- 11. Ana meta - (5)
- 13. Inyaktet - (4)
- 16. Sapisayang - (5)
- 18. Tashi balaka - (3)
- 20. Shishilembadang amshiba - (3)

OLONG PAITEP # 6916 TELANGZÜBA

TIPIEN:

- 1. Kasa, 6. Rangben, 7. Mait,
- 9. Poktet, 11. Ati, 13. Atasa,
- 16. Rür, 17. Rajang, 20. Lanu,
- 24. Nüngjem, 25. Süra.

LANGTSÜNGLEN:

- 1. Khu, 2. Süjak, 3. Onük, 4. Oba,
- 5. Anü, 6. Ratet, 7. Mozü, 8. Ita,
- 10. Tar, 12. Tinu, 14. Salem,
- 15. Aja, 18. Anünü, 19. Taju, 21. Ano,
- 22. Onü, 23. Kua.

NAI-A YA METETTER MA



Maharashtra Health & Welfare Minister Dr. Tanajirao Sawant-i alima nung 'largest medical camp' ayongzüka agiba otsü ka yangluogo. I ba atema International Book of Records ajanga pa nem kulikaket ka agütsüogo. Maharashtra kübok Solapur district nung July 18, 2024 nü medical camp ayongzüka agia liasü. Pandharpur pilgrimage town nung agiba sentong nung nisung 15,12,774 medical check-ups asü. I ba sentong nung doctors aser paramedics 7,500 ajanga shilem agia liasü. I ba medical camp nung Shivajirao Sawant, Dr. Dharmendra Kumar, Dr. Dilip Pawar aser R. K. HIV AIDS Research & Care Centre ajanga yaritep.

COCOMI-i Manipur nung 'public emergency' sangdonger

Imphal, September 6, 2024
(Agencies): Manipur nung tawa telungpurtemi aiben amakba atema Coordinating Committee on Manipur Integrity (COCOMI)-i public emergency sangdongogo.

Tanü nikongdang 3:30 ako meta Bishnupur district kübok Moirang nung bomb amshia amakdang nisung ka tepsetba aser 5 yirutsüba sülen COCOMI-i iba osang metetdaksü.

"Civilian alidak rocket bombs amshiba aitsür. Telungpurtemi advanced weaponry amshia amaker saka central forces-i mangu yutsür. Onoki Centre

sorkar dak joko temulung malemer anungji Manipur nung alirtemi pei lima kümsüka ayutsüla" ta COCOMI convenor Thokchom Somorendro-i ashi.

"Meitei nunger dak rangloka amaktsü aser "Chin-Kuki state" ka akümsü atema tasa atonga inyaker. Tensa mesüngjem tashi Manipur nung school aser college ajak shibangtsü tetuyuba agütsür" ta Somorendro-isa ashi.

Tanü bomb amshia amakdang arishi küm 70 tain RK Rabei Singh asü aser pungu yiru. Parnok Regional Institute of Medical Sciences nung anepaludar.

Manipur nung shisaliok reju ajak shibanger:

Directorate of Education (Schools), Manipur-i September 7, 2024 nü state ajungalen shisaliok rejutem shibangtsü tetuyuba agütsüogo.

Tensa tamajung nung kaketshirtem aser staff kümsüka ayutsü atema sorkar school, sorkari teyari agütsüba school, nija aser central school ajak shibangtsü ta Directorate ajanga ashi.

Zonal Education Officers ajaki pei pei telongtet nung iba osang sangoktsütsü aser nüngdakba mapa inyaktsü nungloksür ta parnokisa ashi.

Assam longjemtsü atema Jana Gana Mana campaign tenzüker

Guwahati, September 6, 2024
(Agencies): Srimanta Shankardev tasüba anogomong nung Guwahati nung Jana Gana Mana Abhiyaan ta ser sentong ka tenzükogo.

Srimanta Shankardev ya Assam nung nüngtugu Vaishnavite reformer ka liasü aser Axom Nagarik Samaj o Bharat Jodo Abhiyaan, Assam ajanga iba sentong tenzükogo.

Guwahati Press Club nung public senden ka amendang shisashirtem aser tanishirtem aden aser parnoki Srimanta Shankardev-i toktsüba senmang indang lemsatetp.

Iba senden nung mendenji Assam nungi nüngtugu journalist & Rajya Sabha MP Ajit Kumar

Bhuyan liasü.

Vaishnavite scholar Dr. Surya Das-i Shankardev ajanga kin, tamangba yimsü aser jenjang balala nübertem ajak longjemtsü meranga inyakba osang lemsatetp.

"Shankardev-i tetsürtem tashi itdaksü aser meimchir tangatetba nung pai mapa inyak. Iba ya tanü asen tensa den kanga tapet lir" ta Dr. Surya-i ashi.

Karbi Anglong nung kin balala tsüingda meputep adokdaksütsü merangba aitsür ta taoba sorkar ketdangtsür aser Karbi nunger lennir Jones Ingti Kathar-i ashi.

Külen, Barnagar B Ed College Principal Dr. Golam Sarwar-ia Miya nunger sempaa mapa inyakba aitsü.

Jana Gana Mana Abhiyaan

ajanga Assam nung telongjem, nisung temeyoktep aliba aser meimchir temeten ajungkettsü nükjidong lir.

Iba sentong ayongertemi Constitution Day, Sukafa Dibash, Chilaray Dibash, Bhimbar Deuri Dibash, Syed Abdul Malik's birthday, Human Rights Day, Shilpi Dibash aser International Wetland Day amongtsü tebilemba lir.

Axom Nagarik Samaj aser Bharat Jodo Abhiyaan ajanga kasa tangatetba aliba teloktem den sendaktepa Assam nung tang aliba BJP sorkar den tokteptsü. Dr. Hiren Gohain aser Dr. Nagen Saikia amala tanishirtemia iba sentong pusema nungitba metetdaksüogo.

CM Sarma-i Assam nunger anisar: Congress & TMC

Guwahati, September 6, 2024
(Agencies): Chief Minister Himanta Biswa Sarma-i Assam Accord nung Clause 6 mapa inyaktsü ta shia Assam nunger mashileni anisar ta Assam Congress aser Trinamool Congress-i metetdaksüogo.

Ministry of Home Affairs (MHA) ajanga tentetba high-powered committee-i ashiba onük 67 nungi 57 mapa küma inyaktsü Cabinet-i lemtetogo ta CM Sarma-i Bodbarnü shia liasü.

Iba committee ya retired judge Biplab Kumar Sarma lenisüba

kübok liasü aser Assam sorkari Clause 6 mapa küma inyaktsü ta Sarma-i ashi.

"Iba ya yimtenren tsütsü asayamenü ka dang lir aser Assam sorkari Centre dangi tebilembatem ang shitettsü" ta Assam Pradesh Congress Committee (APCC) President Bhupen Kumar Borah-i ashi.

"BJP-i aniba state sorkari yimjak nung high-powered committee ajanga ashiba onük ajak lemsateptsüla aser Assam Cabinet-i Centre sorkar mapa inyakba jangjatsütsüla" ta

Trinamool Congress lennir Sushmita Dev-i ashi.

"High-powered committee indang report yimjak nung ano mesayu aser iba report MHA website mesüra Assam sorkar website nung mali. Clause 6 mapa küma meinyakdang tamasa 'Assamese' ta asüba olung ya ratettsüla" ta Dev-i ashi.

"CM Sarma-i high-powered committee report agizükba indang kuli sayutsüla. Iba report ya Centre sorkari agizükogo saka tang tashi miimbanga dang ayur" ta laisa ashi.



Assam Chief Minister Himanta Biswa Sarma-i Hokolbarnü Dibrugarh nung CM's secretariat lapoktsüogo. Dispur nung aliba CM's secretariat sülen iba ya tanabuba secretariat lir aser tanü mezüng senden amendang lemtet aika agiogo. CM Sarma-i ita shia anogo pezü Dibrugarh nung amongtsü aser idangji Upper Assam nunger atema inyaktsü. Dibrugarh nung CM's secretariat lapokba ajanga Tinsukia, Dibrugarh, Sivasagar, Jorhat, Majuli, Golaghat, Charaideo, Lakhimpur aser Dhemaji nung alirtemi Guwahati-i maotsü. Iba lapokba sentong nung Union Minister Sarbananda Sonowal aden. (Dibrugarh, September 6)

Hunter Biden-i tax ken o nung aibelenba nangzükogo

Los Angeles, Rongjui/Sept. 06 (Agencies): Hunter Biden-i federal tax magütsüba atema ken o toku benoka aliba ajunga nung aibelenba lir ta nangzüka federal prosecutors tem tera mangmangdaksü, shirnok iba ken o jembu tenzüksü renema liasü.

2016-19 tsungta income tax nung sen \$1.4 million asaa magütsü ta tai tonglokja aliba US Tir Joe Biden'er jabaso Hunter Biden yagi taoba mapangbo magizüki liasü.

Mezüngbo arishi kum 54 tain Biden yagi pa tai mali ta shiaka pa dak tai tonglokja aliba agizüksü asoshi tezüngzüktep ka aginüa liasü, saka prosecutor temi tai apuba sülen pai aibelenogo ta nangzük.

Ita asem tejakdang prangbong aser temesepba mozü amshiba ken o ka nung pai aibelenba aliba nguteta US tir teinyakdak jabaso mapa tamajung inyakba nung aitsür mezüngbuba akum.

Tax ken o jembu tenzüksü lia pa o melenshiba ya Los Angeles court ka nung Brehostibarnü liasü, kong obendangtöpür tem shim tenzüksü mapang nung nangzük.

Tetendanger tem shimba naparen tenzüksü atema nisung 100 dak tema adenshia

liasü. Biden indang attorney Abbe Lowell-i ashiba agi, "private interest" mechi par client-i ken o nung metokteptsü mulungtet, aser pa temesepba mozü agi meseper aliba mapang atalokba indang pa tembar aser kinunger nem kuli agütsüba nungi jembudaksü, ta ashi.

Aibelenba nangzükba ajanga Biden ya tepuokdak kum 17 tashi ayutsü aser senchi sen \$500,000 nungi \$1 million tashi achitsü, ta Judge Mark Scarsi-i ashi. Pa nem obendang ya December 16 nü agütsütsü, koba White House election agir ita ka sülen aser tebuti US tir menden yutsütsü it aka lia asütsü.

Tir Biden-i par jabaso nem tatok agütsütsü atema executive power mamshitsü ta taoba mapang shia lir.

"Hunter Biden ya tai maket nisung masü. Hunter Biden aibelenba lir. Iba ken o jembitsü tanü asenok court-i arua lir," ta lead prosecutor Leo Wise-i ashi.

Prosecutors temi pa anema ken o benokba 56-page ola tulu adoka court nung zünga ashiba sülen judge-i Biden dang na anema benoka aliba ken o ajak nung nai aibelenba lir asü ta asüngdang dang, "Hao ni

aibelenogo," ta Biden-i ashi. Taoba mapang Biden-i iba ken o agiendaksünüa liasü aser justice department-i bushisüngdangba ya politics ajanga ajungmesoba aser Republican ozüng yanglur temi tebu anema ken o benoktsü inyaktepba ajanga pa dak tenük yok ta shia liasü.

Biden anema December ita 'felony tax offences' asem aser 'misdemeanour offences' trok benoka liasü. Yangji pai tax magütsüba aser pai sen aazükba tiazi ashiba indang densema lir.

2016-19 tsungta Biden-i bendang lima nung shishilembaba nungi sen \$7 million aazükba indang ken o nung tejangja shia lir.

Iba mapang pai taxes memonoki sen \$5 million jungnüa amshir ta ashir. Iba mapang pai temesepba mozü aliba, escorts, hotel tajung nung amungba, sen aika jenjang gari aser aben süoshi aliba nung sen indok saka Biden-i itemji business nung indokba ta tiazi kuli agüja liasü

Tir Biden Wisconsin-i aoba Brehostibar nikongdang White House-i meyiba shilangba mapang osangbener temi par jabaso ken o indang asüngdangba melangzü.

Kenya boarding school kitsük-kirong lendong nung tanur 17 asü

Nairobi, Rongjui/Sept. 06 (Agencies): Kenya linük tiyonglen boarding school dormitory ka nung kitsük-kirong lendong atalokba sülen kaketshir 17 asü aser 13 dak tema mi agi kanga mejungi ronger lir, ta police temi ashir.

Nyeri county nung aliba Hillside Endarasha Primary School nung iba lendong atalokba sülen asürtem ya timba akumtsü akok ta police temi Hokulbarnü ashi.

Asürtem tenüng aser arishi kum ano mejangjateti lir, saka timba tanur lir ta ashir.

Iba school nungya arishi kum pongu nungi 12 tsungta kaketshir 800 shi azünger.

Brehostibar aonung iba mi adokba indang bushisüngdang sütagi, aser nungdakba mera agitsü, ta police odongtar Resila Onyango-i ashi.

"Tasü mang ngutetba ya majiteti rongsar lir," ta Onyango-i osangbener dang ashi. Yariteptsü atema sorkar indang team ka lendong atalokdak lir, ta Onyango-i Kenya indang Hot 96 FM radio nung ashi.

Tir William Ruto-i iba osang angashia aoksar ta ashi aser aibelener nem temerenshi agütsütsü ta metetdaksü.

"Ni tapet ketdangsür dang iba tetsübotsü lendong kanga

junga bushisüngdangtsü totuyuba agütsüogo. Aibelener nem tapet temerenshi agütsütsü," ta pai social media sapang X nung zülua liasü.

Ruto indang deputy Rigathi Gachagua-i school ketdangsürtem dang boarding school tem atema Ministry of Education ajanga safety guidelines agüja aliba sülen anidaksü ajungshia liasü.

Kenya Red Cross-ia iba kitsük-kirong lendong ya temulung shirangtsüka lir ta ashi aser yirur aliba tanur 11 tashi Nyeri Provincial General Hospital-i anir ogo ta metetdaksü.

Police temi iba lendong atalokba tesem ya lungbanga lir ta ashir. "Kenya Red Cross-i kaketshir, tesayur aser lendong agi kongshia aliba kinunger nem 'psychosocial support service' agütsür aser school nung tracing desk ka amenokogo."

Iba school ya Kenya yimtiba Nairobi nungi kilometre 170 shi pilar lir.

Kenyan boarding school nung iba ama kitsük-kirong lendong ya mapang shia ajuru, kong kaketshirtem jenti alir, kechiaser yangji aliba ajanga lesson azüngtsü mapang tali angur aser lenmang talang nung mejajar ta tsürabortemi amanger.

2016 kum Nairobi kübok Kibera tesem nunga tetsürtem indang high school ka nung mi adoka kaketshir toku asü.

Kum ka sülen Nairobi nunga school ka nung mi adoka high school azünger kaketshir ter asü. 2001 kum Nairobi tezülen Kyanguli Secondary School indang dormitory nung mi adoka kaketshir 58 asü.

Jenin nungi Israel sepaitem ainshi, danga West Bank tesemtem amaker

Jenin, Rongjui/Sept. 06 (Agencies): Israel mitkar temi occupied West Bank kübok Jenin yimti nung tesem balala amakdang nisung aika tepseta ki o jen tongtipang aika samatsüba sülen iba yimti aser yangji aliba refugee camp nungi ainshiogo.

Anogo 10 iba yimti kübok tesem balala amakba sülen Israel sepaitem ainshiogo, ta Palestinian news agency Wafa ajanga ashi, saka sepaitem ya temeket nung aliba military checkpoints temi khen atema aoba dang alitsü, ta yangji alirtemi sepaitem ano meyipa arutsü tsübor.

Jenin nung anogo ishika tsungta tanur aser teintet rogotem densema Palestine nung nisung 21 tepsetogo aser nisung 130 yiru, ta Palestinian Ministry of Health ajanga Hokulbarnü sangdong

MOLUNGNEN O

Tenüngsang Ken 23:6
"Aser ni Kibuba kidang teti alitsü"



4.3.1929 – 1.9.2024

Onoki teti meima aliba Obala I. Marlemba Longchar (Yimjenkimong) akümüli wadang tembanga arudang, ana aser talang nungi kinungertem, kidang kimang, pur medemsortem, yimtsür yimertem, Arogo aser lokti tentet balala shirnokisa ozü den temeim agi lemang balala ajanga lemsatepogo nenok ajak dang pelaba lemsateper.

Tanü ozüi tsüngdong arua, ajak tenung teta pelaba meshiteter, saka nenok mapa tajung Tsüngremi moatsütsü ozü tamang teimla akar.

- Temeim Chirurtem, In-laws aser Semchirtem.

Mulungnen O



Tasoba : 26th December 1944
Tasüba : 26th August 2024

Onoki teti dang meima aliba Obala Lt. IMNAMERI (Changtongya Yimsen) ba shirangba anogo nungi tasü nü tashi yimer yimsanger, Arogotem, kidanger, kiyonger, medemertem aser temeimbater nenok kwi kati Obala tatembang anogo tashi nung nübu, rongsen, shisatsü aser sarasadem ajanga yaritepogo nenok ajak dang kinüngertemi kanga pelaba lemsateper.

Ne temeim

Chinur, Anükabang aser Semchirtem.

ka nung ashi.

Hokulbarnü Israel mitkari Jenin nung kiralongrar anema maparen inyaker ta shia liasü saka par sepaitem ainshiba indangbo meshisem.

Jenin nung parnoki kiralongrar 14 tepset aser temulung melemi alir nisung 30 dak tema puogo aser tapoktsü oset 30 shi raksatsü aser mosque ka telung nung nok-nü bendena aliba tesem ka aser tapoktsü oset yanglutsü atema amenoka aliba laboratory ka raksatsü, ta sangdong ka nung ashi.

Israel mitkar West Bank north tsütsü Jenin aser Tulkarem densema tesem balala nung tenük yoker August 28 nü nungi amak tenzük, koba 2000s tetenzüklen tanabuba Intifada sülen iba occupied territory tesashitiba amakba alitsü.

"Jenin nung aliba Palestine nung temi pei kidang nungi temai adoka teraksa ajurua aliba reprangteter aser yimti yutsür aortem meyipa shilanger," ta osangbener kati Ramallah nungi ashi.

Israel mitkar ya West bank kübok danga tesemtem nung tang tashi lir aser Nablus aser Balata refugee camps tem amakba, Bethlehem, Hebron aser Ramallah nung tesem kar meita aoba lir, ta osangbener ashi.

Jenin temeket nung aliba military checkpoints tem shidak lir, anungji parnok anu meyipa shilangtsü akok, ta Wafa ajanga ashi.

Brehostibar aonung Israel sepaitemi Jenin north tsütsü al-Jalama military checkpoint nung Palestine nung nisung pongu dak kanga sashia azük, ta Wafa ajanga shia liasü.

Paris Paralympics 2024: Praveen Kumar-i high jump nung gold angu

Paris, Rongjui/Sept. 06 (Agencies): India nunger Praveen Kumar-i tang tasayadak Paris Paralympics 2024 nung Hokulbarnü tebur high jump T64 tetoktepba nung gold medal nguteta liasü. Ibai Praveen asoshi Paralympics nung medal tanabuba alitsü, shibai Tokyo Games nung silver ka nguteta liasü.

Praveen-i 2.08m alemteta Paris nung India nunger asoshi gold medal trok buba nguteta liasü. USA nungi Derek Loddent-i 2.06m alemteta silver aser Uzbekistan nungi Temurbek Giyazov-i 2.03m alemteta bronze ngua liasü.

T64 ya tetsüng ka junga marakzüteter mesüra temokok tsünglanglen tetsüng ka mesüra anaprong malir athletes atema

lir. Praveen ya T44 category kübok lir aser ibai tetsüng külen arakzüba nung timtema aliba athletes asoshi lir.

Pa ya asodang yongi meshidak liasü aser pa tetsüng abelen aser teperem sendaktepba teren nung kongshia lir. Sharad Kumar aser Mariyappan Thagavelu sülen Paris nung medal angur high jumper tasembubaji Parveen ya alitsü.

Tokyo 2020 Paralympics nung medal angur youngest para-athlete pa liasü, kong pai 2.07m alemteta liasü.

Praveen ya tetsüng ka tatsüba aso aser mezüngbo pa volleyball asaya liasü aser tesülen high jump dangi meyip. Aser ibai pa asoshi telemetba tajung ka liasü, shibai Asia Para

Games 2022 nunga gold medal nguteta Asian record yanglushia 2.05 meters alemteta liasü.

Pai 2019 küm Nottwil, Switzerland nung World Para Athletics Junior Championship alidang silver medal angu aser Dubai nung 2021 küm World Para Athletics FAZZA Grand Prix alidang gold medal nguteta liasü.

World Para Athletics Championship 2023 nung pai bronze nguteta Paris Paralympics atema ticket ajangeta liasü.

Iba ya ajanga Paris Paralympics nung India nungeri medal 26 ngutetogo aser yangji gold trok, silver 9 aser bronze 11 nguteta standings nung jenjang 14 buba nung lir.

US Open 2024: Errani-Vavassori nati mixed doubles kokogo

New York, Rongjui/Sept. 06 (Agencies): Sara Errani aser Andrea Vavassori nati Brehostibarnü Taylor Townsend aser Donald Young den US Open tarep temeyoktep final asayaba nung 7-6 (0), 7-5 agi kokogo aser Young ya asaya nungi anisüngzükogo.

Errani, shibai külem Italian tsür Roberta Vinci den külemi tetsür tarep nung Grand Slam ka nung takok ngua liasü, lai taoba ita Jasmine Paolini den külemi Olympic nung tetsür tarep asaya nung gold medal nguteta liasü.

“Ni atema taküm ya khenyongi balaka lir. Ibai jangratemtsüla,” ta Errani-i ashi.

Townsend aser Young na tanur asüandang nungi medemer liasü aser tena nem iba asayamung nung shilem agitsü atema wild card agüja liasü, koba arishi küm 35 tain Young

atema asayaming tatembangba liasü. Taoba mapang junior ranking nung tematiba jenjang nung alisang Young ya pickleball dangi meyipba sülen kangabo masayai liasü.

“Result ya onoki aginüba ama masü, saka iba dang nungi jenjang tajungba mongutettsü amai bilemer, tanur asüandang reprangba nung arishi tepiyong metettepa alir ka den külemi asayatsü ya ni atema jangratemtsüka liasü,” ta Young-i ashi.

Townsend tenati quarterfinals nung defending champions Anna Danilina aser Harri Heliouarra tsükdakja liasü.

Ajisüaka seed tasembuba nung alir Errani aser Vavassori nati tiebreaker amokbanga asayateta takok angu.

Errani ya tarep temeyoktep nung küm ti masayai arur

Wimbledon nung Vavassori den külem sür asaya liasü. Tena ya round mezüngbuba nung tsükdaktsü aser Olympics nung quarterfinals atong aser iba sülen New York yagi arua liasü.

Young indang tsürabur ya Townsend indang coach liasü, shibai Katerina Siniakova den külemi Wimbledon title akoba sülen tetsür tarep semi-finals nung tsüka liasü.

Asaya temer arishi küm 28 tain Townsend-i, taoba küm Flushing Meadows nung Coco Gauff-i tetsür kija asaya takok anguba aser Hokulbarnü Frances Tiafoe-i tebur kija semi-finals asayaba sülen parnok ama sentsü tanak nisungtemi tali asayatsü ajungmesotsü imlar, ta ashi.

Young nem US Open nung pa asayaba indang noksa ishika bendena yangluba frame ka amoktsü.

Ronaldo-i alizüng tasen tongteta goal 900 junga agütsüogo

Rongjui/Sept. 06, 2024 (Agencies): Cristiano Ronaldo-i Brehostibarnü alizüng tajung ka tongteta goal 900 buba agütsütetogo.

Arishi küm 39 tain Ronaldo-i Croatia den Nations League games asayadang Portugal asoshi goal agüja 2-0 agi akok.

Iba yongji pa temulung nung kongshia corner flag anasa temokok agi tsükiter nüktzü yima benjonga liasü.

Iba goal ya par linük asoshi 131 buba liasü, shibai club level nung Sporting Lisbon, Manchester United, Real Madrid, Juventus aser tang asauaba club Al-Nassr nungia goal agüja lir.

“Alizüng ka tongtetba ajanga kü mulungjang nung kongshi. Ibai alizüng danga kar amai lir, saka goal 900 junga agütsütettsü asoshi anogoshi koda meranga inyaktsü, temang aser tekokok shidak alitsü, aji ni aser ni

müketa alirtemi dang meteta lir.”

“Ibai kü indang career nung alizüng balaka lir.”

Ronaldo-i mezüng goal agütsüandang asor tang arishi küm 21 junger, aser yamaji pa mapang talangka football asaya arur.

Pa arishi küm 17, ita ti aser anogo asem lia October 7, 2002 nung Portugal indang Sporting asoshi goal ana agütsüteta Moreirense madak 3-0 agi akok.

Iba sülen pa Manchester United-i ao aser asaya 293 nung goal 118 agütsü aser iba sülen 2009 küm Real Madrid dangi ao.

Real Madrid nung pa küm toku asayadang games 438 nung goal 450 agütsütet aser Juventus nung adentsü Italy-i ao.

Yangji pa küm asem asayadang goal 101 agütsü aser United-i meyipa arur games 54 nung goal 27 agüja liasü.

STATE OSANG :

Tapak 2 nungi...

ANCSU-i scholarship application atema...

Kasa mapang NEC-Merit Scholarship, National Scholarship for Post Graduate Studies aser Ishan Uday Special Scholarship ya <https://scholarships.gov.in> ajanga September 6, 2024 nü tenzüksü aser October 31, 2024 tashi agütsütettsü, ta ashi.

State Merit & Research Scholarship ya Common Scholarship Portal <https://scholarship.nagaland.gov.in> ajanga September 6, 2024 nungi October 31, 2024 tashi ‘live’ alitsü.

Kaketshir temi agija aliba websites nungi scholarships atema totuyuba tem kanga junga zünga scheme balala indang meteta alitsü, ANCSU

ajanga ayongzük. Tarutsü nung timtem majurutsü mechi kaketshir temi mapang shidak nung scholarship atema apply asütsü ayongzük aser National Scholarship Portal (NSP) kübok scholarship schemes atema apply asüandang one-time registration (OTR) nungdaksü, ta ashi.

Na temsüa aliba nung dang scholarship atema apply asütsü ayongzük aser kasa mapang kaket reju tem dang kaketshirtem angati mesüra jenjang tajemba nung sen agüja scholarship apply asütsü atema computer labs/set amenoktsü/ agütsütsü ajungshir, ta ANCSU sangdong ajangasa ashi.

Mokokchung Photography Club Inti ...

Noksa ka tangokba ajanga osang tajung lemsatepteter, otsü shiteter, anungji alima tensa den peta Mokokchung Photography Club-i sentong balala ayongzüka nüburttem nem noksa tangokba ajanga tajangzük akabattem lemsateptsü merangdita tongti o jembris Limalenden-isa ashi.

Sentong nung Tsüngrem taochi lenisüba jazüka Founding Member Wb.Aso.Imsong-i sarasadema tenzük aser tarur pela agizükba den MPC-i inyaka arubatem Founding Member & Secretary Wt.Sentikala Kichu ajanga telok

tesentepertem den lemsatep iba den ano ketdangpur melentepa laisa ketdangsüa agi, Founding Member Wb.Sashimeren-i tepela o jembi aser telok shisa lemsa mapang agiba den külemi Founding Member & Secretary Wt.Sentikala Kichu-i telok tenüng nung Tsüngrem nem tenüngsang agüja sarasadema sentong tembangba den Founding Member Wt.Temsüchila Jamir ketdangsüba nung iba sentong agi aser sentong agiba ajak Founding Member Sb.Longrangty Longchar-i tiptema züludena renema ayu.

INDIA OSANG :

Tapak 3 nungi...

J&K assembly election atema BJP-i ...

“Kechiyong ozü party-i, Jammu and Kashmir ya India shilem ka liasü aser teti India shilemsa asütsü ta bilemer,” ta pai metetdaksü.

Taoba mapang sorkartem aija Shah-i, “Jammu & Kashmir nung mapang ajak nung kiralongra aser separatism liasü. Ibaji ajanga Jammu and Kashmir tashi meitdaksü aser taoba mapang sorkar ajaki Jammu and Kashmir nung temesüzükba politics asaya,” ta ashi.

Paisa, NDA sorkar küm ter (2014 nungi 2024) tsüngda J&K nung yimjung aser terenlok liasü, iba dak alia yimsüsüba tajung liasü, ta ashi.

Shah-isa Jammu & Kashmir nung nüburttem

dang BJP nem küm pongu agüjang, iba mapang nungji party-i Union Territory nung terenlok mapa inyaktsütsü, ta metetdaksü.

Party manifesto nung ‘Sabka Saath Sabka Vikas’ schemes, lanurtem nem maongka, shisaliok

Facilities tajungba kümtsütsü, state

r o n g s e n k e t t s ü n g ajungkettsütsü, aluyimertem nem PM Kisan Samman Nidhi ajanga tajangzük agütsütsü, anogo shia aayangertem, ASHA & Anganwadi Workers atema inyaktsü, terenlok mapa inyaktsütsü, Medical Facilities tajungba agütsütsü aser Medical Colleges nung menden aika agütsütsü nangzüka lir.

BILEMDANGANG

"Nai meranga inyakra tatem nung anisüngzük angutsü."